



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
12 Feveiru 2015
Tribunál Distritál Dili

JSMP kongratula tribunál tanba aplika instrumentu CEDAW iha desizaun ba krime ho natureza violénsia doméstika

Iha 9 Feveiru 2015, Tribunál Distritál Dili prejide leitura akordaun no kondena arguidu HGS tanba prátika krime violénsia doméstika hasoru nia feen, ne'ebé akontese iha Distritu Dili.

Tribunál prova katak iha Feveiru 2012, arguidu tuku dala ida iha lezada nia oin, dala ida iha kanuruk no halo lezada monu ba rai. Aktu hirak ne'e kauza lezada nia oin bubu, kanuruk moras, mi-aan no desmaia.

Iha 9 Abril 2012, arguidu hodi nia liman sikun fai iha lezada nia oin nune'e rezulta bubu no moras. Tuir-mai iha 19 Abril 2013, arguidu hodi aisar baku iha lezada nia matan fukun, haruka lezada hakneak iha kuartu laran, bandu lezada labele kaer telefone no ba eskola.

Ministériu Públiku akuza arguidu kontra artigu 154 Kódigu Penál kona-ba krime maus tratus ba kónjuje.

Iha leitura akordaun ne'e, tribunál intrudus ba arguidu kona-ba artigu 1, 2 no 5 Konvensaun CEDAW katak nasaun membru hotu-hotu ne'ebé ratifika konvensaun ne'e tenki evita no halakon diskriminasaun hotu-hotu kontra feto.

“JSMP apresia ho desizaun tribunál tanba utiliza instrumentu legal CEDAW nu'udar referensia hodi halo desizaun. Desizaun ne'e nu'udar prátika di'ak atu asegura justisa ba vítima violénsia bazeia ba jéneru, nune'e mós enkoraja públiku nia asesu ba justisa formal,” dehan Diretór Ezekutivu JSMP Luis de Oliveira Sampaio.

JSMP kongratula autór judisiáriu sira tanba utiliza instrumentu legal CEDAW ba krime ho natureza violénsia bazeia ba jéneru. JSMP hanoin katak desizaun ne'e, hanesan progresu ida husi diskusaun meza redonda ne'ebé mak JSMP ho UN Women realiza iha 4 Dezembru 2014, ho profesional legal feto hanesan juis, ministériu públiku, defensoria públiku nomos advogada privada sira kona-ba “Aplikasaun instrumentu CEDAW iha prátika judisiariu”

Ho prátika ne'e, JSMP fiar katak vítima violénsia bazeia jéneru sei hetan protesaun adekuaudu no sei enkoraja vítima sira asesu ba sistema justisa formal.

Depoide julgamentu, tribunál halo alterasaun ba kualifikasaun juridika hodi konjuga artigu 2, 3 no 35 Lei tanbá antes ne'e, akuzasaun ministériu públiku la konjuga ho artigu 2, 3 no 35 Lei Kontra Violénsia Doméstika.

Iha alterasaun ba kualifikasaun juridika ne'e, ministériu públiku no defeza la husu prazu ba sira atu prepara sira nia pozisaun prosesuál, no tribunál kontinua kedas ho leitura akordaun.

Hare ba faktu provadu, no sirkunstánsia atenuante sira, tribunál konklui prosesu ne'e no kondena arguidu ho pena prizaun tinan 3 suspende ba tinan 3 noselu mós kustas judisiáriu US\$50.

Kazu ne'e rezista iha tribunál ho Nú. Prosesu: 302/14.TDDIL. Julgamentu ne'e prejide hosi juis kolektivu ne'ebé representa hosi Dra. Jacinta Correia da Costa representa juis kolektivu. Ministériu Públiku representa hosi Dr. Reinato Bere Nahak no arguidu hetan defeza husi Dr. Sebastião Amado husi Defensória públiku.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org